

## आकाशवाणी जयपुर-अजमेर

### प्रादेशिक समाचार

दिनांक 19.09.2024

समय: 18.45 बजे

- प्रधानमंत्री नरेन्द्र मोदी कह्यो- केन्द्र सरकार खाद्य प्रसंस्करण हलका मांय मोटा सुधार सरू कीनां
- मुख्यमंत्री भजन लाल शर्मा कह्यो- राज्य सरकार बजट मांय करी जया ऐलाण पूरा करण बाबत् तेजी ऊं काम कर रही हैं
- राज्य मांय चौमासा री ई रूत मांय सामान्य ऊं करीब 58 फीसदी बत्ती बिरखा व्ही-आवता 4-5 दिन ऊगणी ज़िलां मांय चौमासा री बिरखा व्हेवण रा आसारं
- किसानां ने खेती री नुवी तकनीक अर अनुसंधान री जाणकारी देवण सारू आकाशवाणी अर दूरदर्शन माथे नुवो कार्यक्रम सरू कर्यो जावेलां

000

प्रधानमंत्री नरेन्द्र मोदी कह्यो है के सरकार देश रा खाद्य हलका मांय नवाचार, थरता अर हिफ़ाजत रा वैश्विक मानक बणावण सारू तैय कीनो हैं वे आज नई दिल्ली मांय राख्यी जा रही वर्ल्ड फूड इंडिया 2024 प्रदर्शनी रे मौके एक वीडियो संदेश रे जरिये बोल रह्या हां प्रधानमंत्री कह्यो के किसान देश रा खाद्य पारिस्थितिकी तंत्र री रीढ़ हैं वे कह्यो के केन्द्र सरकार किसानां री मदद सारू नुवी नीतियां ला रही हैं प्रधानमंत्री कह्यो के सरकार खाद्य प्रसंस्करण हलका मांय मोटा सुधार सरू कीना हैं प्रधानमंत्री वर्ल्ड फूड इंडिया-2024 मांय न्यारा-न्यारा देशां री भागीदारी परां कह्यो के ओ दुनिया सारू काम करण रो बेहतरिन मंच हैं कार्यक्रम मांय उपभोक्ता मामलात, खाद्य अर सार्वजनिक वितरण मंत्री प्रल्हाद जोशी प्रसंस्करण उत्पादां री गुणवत्ता अर ब्रांडिंग बधावण री जरूरत माथे जोर दीनों कार्यक्रम मांय खाद्य प्रसंस्करण उद्योग मंत्री चिराग पासवान ई सिरकत कीनीं चार दिन रा वर्ल्ड फूड इंडिया 2024 आयोजन मांय 90 ऊं बत्ता देश, 26 राज्य अर केंद्र रा राज वाळा प्रदेश, 18 मंत्रालय अर सरकारी निकाय सिरकत कर रह्या हैं

000

सड़क परिवहन अर राजमार्ग मंत्री नितिन गडकरी कह्यो है के सरकार हाइड्रोजन काम ले र आवता बरसां मांय करीब 22 लाख करोड़ रुप्या मोल रा पेट्रोल-डीजल री दिसावर ऊं खरीदी कम कर र इण ने करीब चार लाख करोड़ रुप्या ताई करणो हैं वे दिल्ली मांय राख्यी ज्या एक कार्यक्रम मांय बोल रह्या हां गडकरी कह्यो के सरकार मिराई परियोजना माथे तेजी ऊं काम कर रही हैं मिराई एक कार है, जिण मांय कचरा ऊं पैदा करी ज्यी हाइड्रोजन ईंधन रा तौर ऊं इस्तेमाल करी जावे हैं

000

राज्य री मौजूदा सरकार मांय 10 हजार करोड़ रुप्या मोल रा विकास रा कामां री नींव रखी जा चुकी हैं मुख्यमंत्री भजनलाल शर्मा आज चित्तौड़गढ़ ज़िला रा नरबदिया गांव कने अनगढ़ तीर्थ

स्थल माथे एक पेड़ मां के नाम अभियान रा तहत पौधा रोप्या पाछे राख्यी ज्यी जन सभा मांय आ जाणकारी दीनीं

वे कह्यो के चित्तौड़गढ़ मांय 3 हजार 350 करोड़ रूप्या खर्च वाळी जाखम पेयजल परियोजना रा काम अर माही बेसिन रा पाणी ने जयसमंद ताई लावण बाबत् कर्या जा रह्या हैं मुख्यमंत्री मौजूदा साल ने बिजली, पाणी ने समर्पित बताता थकां कह्या के साल 2027 ताई किसानां ने दिन मांय ई बिजली मुहैया करा दी जावेलां वे कह्यो के ई साल 7 करोड़ पौधा रोपण रो लक्ष्य हासिल कर लियो ज्यो हैं मुख्यमंत्री कह्यो के आवता 5 साल मांय पचास करोड़ पौधा रोपण रो रिकॉर्ड बणायो जावेलां

000

केंद्रीय संचार ब्यूरो रा क्षेत्रीय कार्यालय सवाईमाधोपुर री ओर ऊं पोषण-माह अर स्वच्छता-ही-सेवा अभियान रा तहत डेकवा गांव मांय आज जन जागरूकता रा कार्यक्रम राख्यी ज्यां आं रा तैत स्कूली विद्यार्थी, आंगनबाड़ी कार्यकर्ता अर गांव वाळा रैली निकाळ र पोषण अर स्वच्छता ही सेवा रो संदेश दीनीं ब्यूरो री ओर ऊं विद्यार्थियां सारू चित्रकला होड़ राख्यी ज्यीं पाली जिला रा सुमेरपुर मांय आंगनबाड़ी केन्द्रां माथे पोषण माह रा तहत एक पेड़ मां के नाम अभियान रा तैत आंगनबाड़ी कार्यकर्ता पौधा रोप्या अर साफ-सफाई राखण अर पर्यावरण जागरूकता रो संदेश दीनीं

000

राज्य मांय ई चौमासा री रूत मांय हाल ताई 671 मिलीमीटर ऊं बत्ती बिरखा व्हे चुकी है जो सामान्य ऊं करीब 58 फीसदी बत्ती हैं राज्य रा ऊगणी हलका मांय सामान्य ऊं 49 फीसदी जद के आतूणी हलका मांय सामान्य ऊं 75 फीसदी बत्ती बिरखा व्ही हैं दौसा मांय सब ऊं बत्तो 1 हजार 402 मिलीमीटर मेह बरस्यो प्रदेश रा कुछ हलकां मांय आज ई बिरखा व्हीं राजधानी जयपुर रा केई हलकां मांय छांटो-छिड़को अर हल्की बरसात व्हीं झालावाड़ मांय दोपहरां पाछे चोखो मेह बरस्यो जालौर मांय ई तेज बारिश व्हीं सवाई माधोपुर मांय आखा दिन बादळा मण्ड्या रेहवण पाछे बिरखा व्हीं दौसा, सीकर, चूरू, करौली अर अलवर जिलां मांय ई छांटा-छिड़का अर हल्की बारिश रा समाचार हैं

मौसम विभाग आवता चार-पांच दिन ऊगणी जिलां मांय चौमासा री बिरखा व्हेती रेहवण रा आसार जताया है जद के आतूणी जिलां मांय आवता दो दिन बिरखा व्हेवण री संभावना हैं

000

केन्द्र सरकार किसानां ने कृषि अनुसंधान अर तकनीक रा बारा मांय जाणकारी देवण सारू आवता महीना ऊं आकाशवाणी अर दूरदर्शन माथे कृषि चौपाल नाम रो कार्यक्रम सुरू करेलां कृषि मंत्री शिवराज सिंह चौहान आज नई दिल्ली मांय कृषि मंत्रालय मांय केन्द्र री मौजूदा सरकार रा पहला 100 दिन री उपलब्धियां रो जिक करता थकां आ जाणकारी दीनीं वे बतायो के खेती-बाड़ी रा जाणकार अर वैज्ञानिक किसानां सागे सीधा जुड़ र वां री समस्यावां आगी करेलां ई कार्यक्रम मांय किसानां ने नुवा-नुवा अनुसंधान रा नतीजां री जाणकारी देवण, साखां री किस्मां अर कीड़ां ऊं बचाव रा बारा मांय जाणकारी देवण माथे खास ध्यान दियो जावेलां कार्यक्रम रे जरिये किसानां ने साखां री उपज बधावण ऊं जुड़ी जाणकारी ई दी जावेलां वे बतायो के किसानां री शिकायतां दर्ज करण अर वां ने आगी करण सारू किसान शिकायत निवारण प्रणाली ई बणायी जावेलां कृषि मंत्री हर मंगलवार ने किसानां अर वां रा संगठनां सागे मुलाकात कर र वां री समस्यावां री सुणवाई करण रो ऐलाण ई कीनीं

000

प्रधानमंत्री नरेन्द्र मोदी री अगुवाई वाळी केन्द्र सरकार रा तीजा कार्यकाल रा पहला एक सौ दिन मांय करी ज्या खास कामां री जाणकारी देवण सारू आकाशवाणी जयपुर रा प्रादेशिक समाचार बुलेटिनां मांय खास श्रृंखला चलायी ज्यी हैं इण मांय आज पेश है सरकार कानी ऊं जनता सारू स्वास्थ्य ऊं जुडूया सुबीतां रा बारा मांय करी ज्या फैसलां री जाणकारी

000

प्रदेश मांय हरित ऊर्जा ने बधावो देवण सारू काल ऊं 4 अक्टूबर तांई पाइप लाइन रे जरिये घरेलू गैस रा कनेक्शन लेवण वाळां ने खास सुबीतो दियो जावेलां ई रा तैत कोटा मांय डीपीएनजी कनेक्शन लेवण वाळा पहला एक हजार ग्राहकां ने करीब एक महीना चालण वाळी गैस मुफ्त दी जावेलां राजस्थान स्टेट गैस लिमिटेड आरएसजीएल रा प्रबंध निदेशक रणवीर सिंह आ जाणकारी दीनीं

000

स्वच्छता ही सेवा अभियान रा तैत प्रदेश मांय आज ई न्यारा न्यारा-न्यारा कार्यक्रम राख्यी ज्यां सवाईमाधोपुर रा पशुपालन विभाग मांय अहलकार अर कर्मचारी दफतर रा भवन अर पूरा परिसर मांय साफ-सफाई कीनीं ई मौके सगळां ने साफ-सफाई राखण री शपथ दिरायी ज्यीं अजमेर मांय उत्तर पश्चिम रेलवे रा अजमेर मंडल री ओर ऊं जीएलओ स्पोर्ट्स ग्राउंड ऊं आना सागर चौपाटी तांई साइकिल रैली निकाल र साफ-सफाई राखण रो संदेश दियो ज्यो जयपुर मांय उत्तर-पश्चिम रेलवे खेलकूद संघ री ओर ऊं मैराथन, साईक्लोथन अर वाकोथन रा कार्यक्रम राख्यी ज्यां

000

सूचना अर प्रसारण मंत्रालय क्षेत्रीय कार्यालयां सागे मिल र 2 अक्टूबर ऊं साफ-सफाई रो खास अभियान चलावेलां 31 अक्टूबर तांई चालण वाळा ई अभियान रा तहत दफतर रा परिसर री साफ-सफाई, बेहतर स्थानीय प्रबंधन अर संचार रा न्यारा-न्यारा जरिया ऊं जागरूकता फैलावण माथे खास ध्यान दियो जावेलां सूचना अर प्रसारण सचिव संजय जाजू सगळी मीडिया इकाइयां रा मुखियां सागे ई खास अभियान रा तैत कर्या जावण वाळा कामां रो जायजो लीनीं

000

दौसा जिला मांय बांदीकुई कने जोधपुरिया गांव मांय काल बोरवेल कने बण्या 35 फुट उण्डा खाडा मांय पडी 2 साल री टाबरी नीरू गुर्जर ने एसडीआरएफ अर एनडीआरएफ री टीम हिफाजत सागे निकाल लीनीं आ टाबरी खेलती बगत बोरवेल कने बण्या खाडा मांय पड गयी हीं टाबरी ने निकालबा सारू राज्य अर राष्ट्रीय आपदा मोचन बल रा जवान मिल र बोरवेल मांय बीएलसी कैमरो डाल र बच्ची तांई ऑक्सीजन पूगार्यीं टेम-टेम परां टाबरी ने बोतल ऊं पाणी अर दूध दियो ज्यो आज संवारे करीब 10 बज्यां एसडीआरएफ रा दो जवान संदीप कुमार अर बजरंग लाल बच्ची ने हिफाजत सागे जीवती निकाल लीनीं

000

राज्य स्तर री 68वीं उच्च प्राथमिक, माध्यमिक अर उच्च माध्यमिक विद्यालय खेलकूद होड़ आज कोटा मांय सरू व्हीं शिक्षा मंत्री मदन दिलावर होड़ रा उद्घाटन जळसा मांय कह्यो के होड़ रे मार्फत खिलाड़ियां मांय आगे बढबा री भावना पैदा व्हे हैं उद्घाटन कार्यक्रम मांय प्रदेश रा न्यारा-न्यारा जिलां ऊं आया करीब 3 हजार खिलाडी मार्चपास्ट कीनों 24 सितम्बर तांई चालण वाळी आं होड़ां मांय 14 साल तांई उम्र रा विद्यार्थियां सारू सॉफ्टबॉल अर 17 अर 19 साल तांई रा छात्र-छात्रावां सारू शतरंज रा मुकाबला व्हेलां